



U Sudu BiH nastavljeno suđenje Bilalu Bosniću

Svjedoci ispitivani o Aliji Keseroviću, koji je u Siriji

Bosnić govorio o pravljenu mesdžida u Velikoj Bojnoj i o stvaranju Islamske države u Siriji, rekao Merim Keserović

Ispitivanjem tri svjedoka optužbe jučer je u Sudu BiH nastavljeno suđenje Huseinu Bosniću Bilalu iz Bužima, optuženom za krivično djelo javnog poticanja na terorističke aktivnosti u vezi s vrbovanjem radi terorističkih aktivnosti i organiziranjem terorističke grupe. Prvi svjedok bio je Merim Keserović (1996.) iz Velike Kladuše.

Odgovarajući na pitanja tužioca Dubravka Čampare od kada poznaje optuženog Bosnića, svjedok je odgovorio od 2014. godine.

- Krenuo sam kod njega na džumu u Bužim, mesdžid koji se nalazi u sklopu njego-



Bosnić: Optužen za vrbovanje mladica za odlaske na strana ratišta

ve kuće. Par puta sam tamo bio, a jednom sam ostao poslije džume. Bio je i Alija Keserović. Nisam bio među njima tamo. Uglavnom su to bili normalni razgovori - rekao je Merim Keserović.

On je za Aliju Keserovića, kojeg poznaje od djetinjstva, rekao da se trenutno nalazi u Siriji. Svjedok je davao i izjavu u SIPA-i, 2. decembra 2014. godine. Naveo je i da je Bosnić govorio o pravljenu mesdžida u Velikoj Bojnoj i o stvaranju Islamske države u Siriji.

Na pitanje tužioca je li svjedok Merim Keserović krenuo u Siriju 17. februara s

Hušidićem, da je kupio kartu i dobio imena ljudi kojima se trebao javiti tamo, svjedok je potvrdno odgovorio.

Branilac optuženog Adil Lozo pitao je svjedoka kada je Alija Keserović otišao u Siriju.

- To se desilo kada je Bosnić već bio u pritvoru. Alija Keserović imao je nekih problema, ali nije puno o tome pričao. Cuo sam se s njim poslije, kad je otišao u Siriju - rekao je Merim Keserović.

Drugi svjedok na suđenju bio je Kenan Keserović (1989.) iz Velike Kladuše. Pitanja tužioca odnosila su se, također, na Aliju Keserovića.

- To mi je komšija i rođak. On se danas nalazi u Siriji. Nazvao me, ne mogu se sjetiti koji dan, nasmijao se i rekao mi da prenesem njegovoj majci da je dobro i zdravo i da se nalazi u Siriji. Kada sam mu rekao: „Što si baš mene nazvao“, odgovorio mi je da ima samo moj broj. Nisam prenio to njegovoj majci, ali je ona za ovu informaciju saznala od komšije - rekao je Kenan Keserović. **Es.D.**

Čuvao koze kod Bosnića

Kenan Keserović kazao je da je Alija Keserović jedno vrijeme čuvao koze za Bosnića.

- Dok je čuvao koze, dolazio je kući na dan-dva. Promijenio je ponašanje, nije se više s nama družio, a na svaku psovku burno je reagirao. Bio je slabog imovnog stanja. Od raka mu je umro otac, koji ga je izdržavao, njega i njegovu porodicu - rekao je Kenan Keserović i dodao da ne zna kako je Alija prikupio novac za odlazak u Siriju.